



PHAIKHOTHANG BRANCH CHURCH, KOCHUAM PITING AH LÂNKAI NI, (28-12-2025)

To, _____

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



REVIVAL I MAMAWU HI

- Kipiakna
- Thilpha hi ding ah Khrista ah siam
- Khangthakte leh Kingaizawngna

Editor : Rev. Kamkhotinthang Neihsial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonthang Vaiphei
: Upa Thualkholian
: Upa Nengsuanthang
: Pi Neikhovak, General Secretary, CKNP
: Tv. Lianmuanthang, General Secretary, CKKP

Business Manager : Tual Upa Langlalthamuan
TPC Office D. Phailian
P.O. Box 107 Churachandpur-795128
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man penuam leh a la thak nuamte'n Business Manager kiang ah hiatsak di.

A SUNG AH THU UMTE

- | | |
|--------------------------------------|----|
| 1. Editorial | 01 |
| 2. Kochuam Huang | 03 |
| 3. Revival i mamawu hi | 05 |
| 4. Kipiakna | 09 |
| 4. Thilpha hi ding ah Khrist ah siam | 12 |
| 5. Khangthakte leh kingaizawngna | 15 |
| 6. Lungzing a hi ziaak ah lungke lo | 18 |
| 7. Hukdamna | 23 |
| 8. Khupdin in a zo hi | 27 |
| 9. KNP Huang | 31 |

SYNOD PUIPATE

Moderator	:	Rev. S Lama Vaiphei
Secretaries	:	Rev. Summinlian Vaiphei (Sr.) Rev. Lalpiaklian (Jr.)
Finance Officer	:	Upa Tinliankham
Statistician	:	Rev. Andrew LR Khiangte
Executive Secretary	:	Rev. Kamkhotinthang Neihsial
Consultant	:	Rev. C. Lalremruata

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Kumthak 2026 ei puitungtu Pathian kiang in kipak thu gen hitiu. Kochuam tin te'n thagau lam maljawlna dawnna kum ah i nei thei chiatna ding un pauchap hitiu.
2. Hinna Vâk hi kum 18 tiang ting thei ah ei puitu Pathian kiang in kipakthu gen hitiu in, lamzang tak ah a chia zawm zel theina ding in a buaipute â ding in dawn hitiu.
3. Pastor Bial KKP Conference Taksa leh Thagau ah lawting tak ah mat a hi theina ding in pauchap hitiu.
4. Gamsung buaina ziaak ah panlatu pawl chuam chuam ah puitute â ding in pauchap hitiu.

LAL JESU CHIAL HITIU

Hinna Vâk simtu dawi tak zosiate kum 2026 sung pumpi malzawlina tam tak tawh mang zo ngei ding in dawisakna ka hung lân hi.

Tukum 2026 i mat patnau leh i kalsuannau kawng bangkim ah hin Lal Jesu chial leuhin nawp a um hi. Johan 2:1-12 sung in Lal Jesu'n Kana khua ah Mo Lawpna ah thilmak a bawl thu i mu'u ah, zia chu thildang hilo in tui uain a suaksak thu a hi.

Mo neitu'n mo lawm ah hung khawmte â ding ah uain luai a thê laklaw lai tak in uain a hung tasam ta. Zia hun lai ah uain hi grep ga ah kipat kisiam sek a hia. Dawn thei a hina ding in a tawmpen ah tha thum (3) lut sek a hi. Uain a taksap lai tak ah Mo lawmtupa lungthim di i vak suangtua a hi chun, a beidawn didan leh a lungkham didan chu hethiam chiat mai hitiu. Maleh, mo lawmtu'n a mo lawpna ah Lal Jesu a lah chial khak khel khel zia in mo lawm ding ah hung zosiate chu a chaina tiang in uain chîk tak a dawn sak thei hi. A mualpho puai.

Zia Mo Lawpna ah hin Lal Jesu hi chial khak in a lah umlo taleh Mo lawmtu mualpho leh zachak didan hi la ngaitua kha em! Mo Lawpna ah hin Jesu chu chial ahi gual in a va pang ah, Ama thupiak gual ah sep leh bawl a hi zia in tuibêl paguk (6) dim hial chu uain a suak sak hi.

Unaute haw, zia hi ngaitua zui leuhin ka nuam hi. Kum 2026 i mat patnau ah hin i nisîn hinkhuau ah sep leh bawl i neiteu leh i kalsuanna zosiau ah hin Lal Jesu chial in ama dawidan ah kalsuan in sêm leuhin mualpho theina lak ah kipat in vênbit in um hitiu in, i chung un Lalpa'n thilmak hun bawl intin, i kiginchak khellam in malzawlina ei vuk di a hi.

Insung etkawlina, Kochuam etkawlina, khawtang vaihawmna, gam leh nam nasepna leh i kalsuannau leh i sepna zosiate ah hin Lal Jesu i chial kha sek nau em? Lal Jesu thu i mang sek nau em? Lal Jesu'n panmun a chang sek na em? ti hi kingaitua zing hitiu. Lal Jesu panlona mun ah chun limna, lungawina leh kipakna a um pua, mazawlina'n le zuilo a hi. Nisîn ah Lal Jesu chial zing ah, Ama tawh kalsuan khawm zing thei ding in Lalpa'n simtute zosia ei malzawl chiat ta hen!

KIPAKTHU GENNA

Kochuam lekhabu 'Hinna Vak' ei print piak, K. Pyar's Digital Print te'n December 2025 Issue kha Christmas thilpiak ti in a man ei la puau ah, kipakthu i gen u'i. A kiphalnau Pathian in a le tamtak in malzawl henla, midangte â ding ah malzawlina hizing thei ding in dawisakna i lân u'i.

~Editor



Kochuam Huang

**PHAIKHOTHANG BRANCH
CHURCH KOCHUAM PITING
AH LÂNGKAI HITA**

Ni 28 December, 2025 (Path-ianni) khan Upa Nengsuanthang, Lamka South Presbytery Moderator chun Phaikhothang Branch Church chu Kochuam Piting hi ding in a lêngkai hi.

Phaikhothang Kochuam dinmun zia a gual a hi:

In zat - 20

Dan zokim zosia zat - 76

Kochuam mi zosia zat - 117

**PCI General Assembly
Executive Committee
meeting**

PCI General Assembly Executive Committee Meeting, ni 13 - 15 January, KJP Synod Mihngi (Sara'l Adventure Resort) Lapmala, East Jaintia Hills ah nei a hin, zia hun ah hin Executive Secretary - Rev. Kamkhotinthang Neihzial leh Consultant - Rev. Lalremruata te a va pang thei ui.

**Contract Missionary lak di
thu**

Synod in Contract ah sem di Missionary pakhat (1) lak ding a ti chu, a lak didan ziagual a hi.

1. Qualification:

Class XII passed.

**2. Last date of Application
Submission :**

Ni 16.01.2026 (Simhaini)

3. Written test :

Ni 20.01.2026 (Sepkitni)
11:00 a.m

4. Personal Interview:

Ni 22.01.2026 (Ningani)
11:00 a.m

5. Syllabus :

Bible Knowledge, General Knowledge leh Church History.

**Synod Office ah semtu thak
leh chanvo siamlem**

Kum 2026 Synod Office ah semtu thak Tv. Haulaljem in Ni 8 January, 2026 ni'n a join pan ah, zia ni hin Office ah semtu umsate le mawpuakna chanvo ziagual hin siamlem ah umte tawh Evangelist Teacher Letmang leh L. David te le Office ah um tadi phawt ding ah ti a hi dungzui un, Orientation le Office ah hotute'n a neipi ui.

**Rostad Memorial High School
ah semtu lak di thu**

Rostad Memorial High School ah sem di English (Graduate Teacher) -1, Hindi Teacher (Under Graduate) -1, Social Science Teacher (Graduate) -2, (**Preference - history, Geography**) lak di a tiu chu, a lak di dan ziagual hi a hi.

- 1. Last Date of form Submission: 27 January, 2026 (*Sepkitni*)
- 2. Written Test: 28 January, 2026 (*Nilaini*) 11:00 a.m
- 3. Personal Interview: 29 January, 2026 (*Ningani*) 11:00 am

Pastor Transfer & Posting

Synod Kikhawmpi chun kumthak, Kum 2026 apat Pastor-te umna ding ziagual hin a siam lem hi. Induction ni 11 January, 2026.

S/N	Min	Umna di	Induction bawltu
1.	Rev. Thianginlim	S. Kawtlian	Rev. S Lama Vaphei
2.	Rev. S. Mangminthang	Kangvai	Rev. Vanlalchhuanga
3.	Rev. Summinlian	S. Munnuam	Rev. K. Neihsial
4.	Rev. Khaisonthang Vaiphei	Delhi	Rev. Haulalven
5.	Rev. Lallunglian Vaiphei	Thembasuk	Rev. Rory Lalrinsanga
6.	Rev. Lalgouliau	Phaipheng	Rev. S. Genlianpau
7.	Rev. S. Lunmuanthang	Leijangphai	Rev. C. Lalremruata
8.	Pro. Pastor Henlallian	Gangpimual	Rev. Lalpiaklian
9.	Rev. Paulalsiam	Office	

REVIVAL I MAMAWU HI (Sam 85:6-7)

~ Rev. T. Zuanlal
Bethany

“Nangma ah la mite a lim theina ding un, ei hihal kitlo di la hem? Aw Lalpa, la ngilneina chu ei musak inla, la hukdamna chu ei pe ta’n.”

Halthakna tunna mun chuh Thagau Thiangtho sunthâkna a hilo leh kanthakna ahia, zia hun ah chun Pathian hepina leh dawisakna mite’n a dawng ua, zialo ah chun Thagaulam ah khatlawna, piangthaklote pianthakna, mipite ginna hing zo talote Thagaulam ah hinna thak a pia a hi. Pathian ngaidamna leh gamsung damna a hi (Nasepte 2; 2 Korinth 7:14).

Ahileh i gamsung ua, i Kochuam sung ua halthakna bang atia chawlta a hi diam? A ziak gen di tampi um ina. Leonard Ravenhill lekhabu “Why revival tarries?” (Bang atia Revival chawlta?) ti ah chun, “Kochuam in Thagau Thiangtho mei a mansua ta, mipite gawtmun meidil lam in a chiatau hi” a ti a hi.

Bible chun, Lalpa Pathian in halthakna i dawn didan hiti hi a gen hi, “Ka minpu ka mite a hung kingaitawm ua, a hung pauchap ua, ka mel a hawl ua, a nunsiatnau lampi a hun kiheisan phat uh leh van apat in a la ngaitha’ng katin, a gitlonau ngaidam in a gam uh hidam kit ding ka hi (2 Kh 7:14). Ziatak ah hin

ei haw hi ding thil pali i mu, Pathian in a hi ding Pathum i mukit thei ui. Kingaitawmna, Pauchapna, Pathian mel hawl ah, sual haisan ah Pathian sukdamna mite a chandan vak gen hitiu.

Tumalam deu ah khan unau ICI te Kochuam Pastor pakhat Cachar Hills lam in Pastor na sem in a um a, a sepna mun ah chu Thagau lam ah hul leh bangmalo a hi a kihia, chutichun gamlak ah leikawhawm ah kikul (camp) in kingaitawm in Lalpa mel hawl ah nasatak ah a fellonate Lalpa kiang ah thuphachawi in a pauchap ah, chawlkal khat vel a kikul nung ah chun Thagau pawlna a dawngta, Lalpa'n a dinmun a kimusakna ah chun, "Va-akpi no nei a note vakna ding nawitui neilo, nawi tep dekduk gual in ka kihiai" ati a hi. Lalpa'n a dinmun apat chun siamthak in thagau ah thaununa (thuamna) a dawngta. A khawmpiu ah

Workers Camp a matnau ah chun a thugen pipen in a pang hi. Ama'n Lalpa apat halthakna a dawn ziak in, a camp ua le hakthakna a tung ngal a hi.

Khawvel thiamna, pilna, hauna, kithuamna i matkhak ah, pulpit ah i kaipi khak diu a lau um mama hi. Mosi gual in Pathian in la kengtaw sut in ei ti ding a hi. Kochuam mite haw hi i Bialtu Pastorte, Upate, Kochuam puitu hawmthawna kampau i gitsak phat leh chu halthakna i mamawu hi ti a kichian hi. Pastor te hi Pathian mimat a kul takzet a hi. John Knox Pathian in a mat ah Scotland gam halthakna a tuna ding in hiti hin a pauchap hi. "Aw Lalpa Scotland ei pian a hilo leh thi mai zawngka" a ti ahi kha. John Knox Pauchapna gual in Pauchap tiam hitiu, "Aw Lalpa ka bial, ka kochuam, ka insung ei pian tin pauchap leu hin revival hung kipan ngal ding a hi.

Kochuamte hin Pastor pa Pathian in a mat theina ding in Thagau thaunu na a chan ngeina ding in Pauchappi hitiu. Pauchapna hi titak tak na panglo chun a kihel mai mai gual a hi thei hi.

Khatvei Kochuam pakhat in a Pastor pau chu a hawmthaw deu uh hi'na, hotute kiang ah Pastor dang (a thak) ei piau in ti in a va dawn ua, vangphat um tak in a Kochuamte nasa tak ah a pauchap ua a hileh Pathian Thagau nasepna a hung kilang ta, Pastor pa chun siamthakna leh halthakna chang in a hung um ta a hi. Kochuam hotute chun Khawmpi pui-tute kiang in Pastor thak ka nei tau in, Pastor dang ei hun sawl piak ta kiu ava tiu ah, Pathian nasemtu zing tho peilo, chep leh muam leh a dang dang ah kisum theilo pa chu Khrista ah siamthak in a umta, Pastor thak a neitau a hi. Zia Pastor Pa leh a Kochuam chanchin apat hin i Bial uh mun khenkhat umdan le

a hikha thei hi. Unaute, Pastor Pa leh Bial leh Kochuamte pangkhawm ah Pathian belam vak ihu a, Pauchapkhawm in hileu hin i gam ua revival tungkit ngei ding a hi. Kingaitawm in, Pauchap in Lalpa mel hawl hitiu. i pauchap peilonateu, i nun-siatnateu haw nusia in Lalpa kengbul in a ngaidamna dawn in kilânthak hitiu.

1972 kum in Evangelical Fellowship of India Pastor Bulletin ka sim leh England kumpite Pastor khat chun mang lamdang tak khat hi amat a, a manglam ah chun Lalpa Jesu Lalchutpha ma'n ava ding ah, Lalpa Jesu chun dawtna pani lungthim khawi tak a dawng hi. Ziate chu (1) Zi leh chate ka hun pia ziate haw Thagau chu khawi ah a um tau em? (2) La Kochuam etkawlte Thagau khawi ah a umtau em? a ti ah chun, a dawnhuna da umtak chu, "Lalpa ka la genpiak pua a hi" a ti.

Seppi dawitak, zia Pastor pan dawtna a maitua hi, ei hawn le maitua tho ding ihu a hi. I Bialtu Pastorte hawu hi i Khawmpi'n kum 5 sung bial khat enkawl ding ah a kawite ahia, Bial sung ah Thagaulam hinna neilote'n hinna a nei a, halthakna, masawwna i dawn theina ding in Kochuamte tawh semkhawm ah, Pastor pa mai mawpuakna hilo in i leng ua mawpuakna a hi.

Pastor hi Thagaulam puitu ahia, La pakhat "Lei belampute'n lah a pui thei puau, bangtin a hi ta diam Lalpa" ti i sak phat uh leh Pastorte hatlona sulangtu gual dan ah ngai lawi le a um kha thei, La phuaktu lunggil tak ah Thagau Thiangtho ngaichatna a lian, Thagau Thiangtho panglo in lei belampute pui dik theilo a hi ti a kichian a hi. Zia zia chun, Thagau Thiangtho thaunu i mamaw (Thagau thuamna) tak zet uh a hi. "Aw Lalpa thau ei nu in" ti in pauchap hitiu.

Apostol Paul le Pathian thaunu a chan theina ding in Arabia gamthim ah kum 3 sung um a hi kha (Gal 1:16-17).

Halthakna hi Thagau Thiangtho nasep a hi. Aw Thagau nunnem ka hun ngai ui, nangma lo in mipi ka vai ui" zia pauchapna hi i pauchapnau hi hen aw!

Sam ziktun a gengual in mitthi luang pum in pauchap in Buchi pawtpi ding in Lalpa apat thagaulam halthakna i mamawu a hi. Lalpa Jesu gual in zingpi tak ah tho in Lalpa kengbul in i gamsung ah halthakna a tunna ding in Pauchap thak kit hitiu. A ga chu mu ngei ding ihu. Lalpa kengbul in halthakna i chan kit theina ding un kingaitawm ah thunuai gawl in zawna puanlap dawmsang ding, khupdin in galdo ding in kipan thak hitiu, I mipi a manthai zaw mau in. Lalpa'n simtu Zosia a ding in malzawl ta hen. Amen.

KIPIAKNA (COMMITMENT)

(Luka 9: 57-62)

~ Rev. Siamlalron
i/c Sumtukphai Pastor Bial

Kum bul ah um i hi ziaak un taksa leh thagau lam ah i pawimaw ma mau khat chu kipiakna hi a hi. Kipiakna kiti hi gendan chuam chuam a umthei hi. Tuni kipiakna ka gen ût pen chu thagau lam ah Pathian â ding ah kipiakna hi a hi. Kochuam, Numei pawl leh Khanglai lam ah mawpuakna bîk nei ziaak ah kipia ham ham bangzat hem um hitiu in, mawpuakna nei ziaak le hilo ah Pathian nasepna ah kipia zo him him le tam tak um ngei hitiu. Eimau dinmun chiat ki enchian thak hitiu. Mawpuakna nei ziaak leh lawkna ding ngaitua ah ki pia i hui em? Ahilole, Pathian Hepina leh ei tatna ziaak ah ginum ah bang gual dinmun ah le Pathian â ding ah kipia i hi em? I kipiaknau kha enchian thak kit hitiu.

1. Luka 9:57-62 i et chun Jesu tawh mi pathum (3) a kituak ua, mi pani in “Lalpa hun zui ingka” a tiu a, ahinla a zui masang un a dinmun (condition) ding uh amau dawî dan a kisiam chiat ua. Lal Jesu’n a dinmun a genchian piak zel hi. Mi pakhat chu Jesu’n a ko thaw ah, ahinla ama’n le a um ding dan ama dawîdan tak a kisiam kit hi.
2. Hung zui ingka tite tawh, Jesu ngei in a ko pa khan le kilepna/paume (excuse) a siam chiat ua, Jesu zui nuam maleu dinmun (condition) nei ah zui

ding, a pawimaw ngai teu sukfel masak ding, a khawsaknau siamtup (stable) masak ding, a hinkhua ua a mawpuakna (*responsibility*) teusukpitin (*fulfil*) phawt ding, zia zaw phat chule thawveng tak ah Jesu zui ding ti a hi.

3. Ahinla, zia Bible chang ah muthei kichian tak khat chu Jesu'n a insung miteu leh mithi chu a ngai pawimawlo a hi pua, a dawipen chu thildang zosia sang ah ama pawimaw pen ah kawi (*priority*) ding a hi. Pawimaw ngai pen (*priority*) a piaklo zia un zia mi pathum te khan le Jesu zui zianglo in thildang pawimaw masa zawn a kawi ua, zia chu Jesu'n a dawilo a hi. Banggual buaina leh haksatna tuak ding hileu le Ama zui tawp ziang ding hi Jesu'n a dawilo a hi. Lungthim laklaw tak ah zui ding anuam pua, lunggil zosia, hinna zosia, leh ngaituana zosia

(Matthai 22:37) tawh, ama leh ama kihemil ah ama kraws kiput ah zui ding in ei dawilo zaw a hi (Matthai 16:24).

4. 'Lalpa, ka pa ei vuisak tadi in' ti pa hi i et a hi chun a kiho lai ua hi a pa thi ta hi ding in ginchak a um pua, ka pa va enkawl ing ka tin, a thi zaw nung leh thawveng tak in la nung hung zui zaw nang ka ti a gen ut zawk a bang hi. Ziaziakchun, Jesu'n mithi te chun amau mithi ala kivui tau hen, nang vang chia inla Pathian gam thu va gen zak tan (9:60) ati piak a hi.

5. Ziagual ma chun a in ah mite mangpha va thâk masa gaw pa hile amasa pa gual tho in, insung ah ka mawpuakna ka hung chai phatle zalen takin, ei subuai ding umlo in hung zui ingka ti a hi tuak hi. Ziaziakchun, Jesu'n, hukdam hi ngâl ah nunglam ngai nalâi te chu Pathian

gam mi hitâklo (9:62) a hi dan a genpiak hiding a hi. A lungthim ah Jesu nungzui ding ah kipiakna nei ta ngal, zui zianglo ah thildang pawimaw ngai zawk ah nei chu gingtu diktak te um ding dan hilo a hi. A masa pen ah Jesu kawi ah, banggual dinmun ale Ama zui ziang ding hi Lal Jesu dawi dan a hi.

Tuanthu (*story*) pakhat in – vawkpi leh âkpi lampi ah a kitawn ua leh advertisement board khat ala um ah, genthei te panpi un ti a kiziak ah âkpi chun vawkpi kiang in ken âktui hun thaw ing katin nang la taksa hun thaw in atia kipaktak in a um tau ah ahinla vawkpi ahung ki ngaitua leh ama chun a hinna zosia tuak dawking ahidan ahung ki hiatdaw phat in lem asa ta puai, a kitia. Ziagual chet chu ahi Pathian nasepna le khenkhat chun i thei kham kham i va tuak ham ham ua,

khenkhat chun i hina/theina zosia tawh Pathian na a kitem hi. Nang bang dinmun in la pang em kingaitua in?

Jesu nungzuina ahin paumê (*excuse*) i siam nawp chun siam ding a bei pua, kipiakna tak tak tawh a nung i zui nawp chun gin um tak in a zuithei ma ma hi. Pathian a ding ah kipia diktak te chu mawpuakna nei leh neilo a buai pi puau ah, mi thugen zia te, mi hindan zia te, kochuam puitu khat leh ni zia k bep in a ki suthatda ngai puau. Bang dinmun hiziang lele Lal Jesu a masapen (*priority*) ah kawi in, ginum tak in a kipia ziang ui. Ginum tak ah a nung zuite chu a pawimaw hun tak in Pathian in panpi dan leh sawmdawl dan a thiam mama hi. ikipiakna teu en thak zel in, itheinaw leh hina zosia tawh ginum tak in Lalpa a ding in kipia zel hitiu.

Lalpa'n a thu malsawm hen!

THILPHA HI DING AH KHRISTA AH SIAM (Eph 2:10)

~ *Upa Lalminsang*
Hill town

“Thilpha hi ding ah Khrista Jesu ah chun siam ah um in, Ama khutsuak i hingal un; zia thilpha hi chu i khawsak dan dingua Pathian in a siam khawlsa a hi.”

Gingtute chu thilpha bawl ding ah siam i hiu ah, phatna (mi pha), hawina (mi hawi), thilsia bangma bawlo ah um mai a huntawk pua, Thilpha hi ding ah Khrista Jesu ah siam i hiu hi. “Thil phalo, soal ka bawlo nâk leh a hawk pua’i” ti ah um hiat hiat ding ah siam i hi puau ti leu hin kichian dik ten ding in a ginchak um hi.

Thilphalo bawlo ah ginum tak ah um hiat hiat hih a huntawk ziang pua, Thilpha pha bawl ding ah siam ah um i hinau hih tu kum ngai pawimaw diak thak zel leu hin a dawum hi. Zia chu Gingtute khawsak dan ding ah Pathian in Khrista Jesu ah ei siam khawlsa a hi. Ei siamtu’n i um didan a guat gual tak ah um chu Gingtute hin didan leh mawpuakna a hi.	Pathian mapuina leh umpina zâl in kum thak lânkai in i um tau ah, kum thak, hun thak a hi tawh kitawn in Lalpa â ding ah a tam theipen sem ding ah kilat thak hileh a dawum hi. Kum chiata leh hun chiasate ah khan thilpha bang gual i lah bawl em, bawl thei zing ngal ah thilpha bawlo banggual i nei diam! Hun chiasa chu a chiata, hun luite ah i dinmunte khan tu hun ah umzia a neita pua,
---	---

a pawimaw chu tu hun ah i umdan hih a hi zel hi ti ngaitua thak hitu.

Ni dang ah mi pha ma ma chu tu hun ah a phat tâklo chun a ni danglai phatna khan tu hin umzia a nei ta pua'i. A neulai ah naupang pha tak, a let nung ah pha talo chu mipha a hi a ti theilo gual in kum chiatate ah khan thilpha bangzat a lah bawl le hinle tu kum ah i kithada chun hun chiasate ah i thilpha bawlte kha suan ziang thei a hi pua, i hinkhua ah umzia a nei tâklo zia in i tuhun mat zinglai, matdan hih ngaitua thak thak a pawimaw hi. Tu kum bang gual in hun la mang diam, Gingtu hinkhua ah hin hun chiasa ah i thilbawlte ngansia ziang theilo di a tam hi. Tu kum ah thilpha bang ka bawlzawm diam, bang ka bawlpan diam, ka Insung ah, Kochuam ah leh khawtâng ah bang ka bawl thei a um diam ti ngaitua nawn kit in, a tam theipen thilpha bawl na'n mang hitu.

Thilpha chu bang a hi diam?

Bible simte, pauchapte leh Biak In kai zingte hi mi dangte ei het ah thilpha thupi tak bawl hi in a kilanglo maithei, mi dangte hiat kham leh khawtâng ah kilangdaw thei thilpha kibawlte gual ah langdawklo maleh, Gingtu hinkhua'n a mamaw thilpha bawl pawimaw tak a hi. Gingtute â ding in Pathian biak kikhawpna Biak In ah kikhawp mai hile thilpha ma ma a hi. Mi zosia'n haksalo ah thilpha a bawl thei kikhawp hun sin leh vakikhawp mai hile a lopi hi.

Kikhawp bep a huntaw k hi tina hi zianglo maleh kikhawm zing Gingtu chu nungtawl a um ngai pua, Biak In lam a gamlat tak zia ah mi a nungtawl sek hi. Biak In kai chu ama â ding ah thilpha a hi gual ma in mi dangte suhhulimtu, tilkhotu leh mi ettawn a hi sek hi. Nisin a hun dungzui ah annék sek hih khanna, mawmna a hia, tui tak ah khatvei/nivei tampi nek ziang in a kikhangthut ziang thei diak pua'i. Zia gual machun Camp, Crusade leh

hun bikte bep ah nasatak ah
Biak In ngainat hin Thagau
lam nun a chawm khanglian
thut ziang thei pua, khang
hul hul gual in kingai maleu a
lungthim bep uh a hia, kiam
hul hul chu amabak uh a hi
zel hi. Thugen thiam thugen
hunte bep hilo in Bang hun ah
le Biak In lam zuan zing mai leu
hin nungtawl ti um theilo mai
di dan chu a hia, nungtawllô
chu hing zing tina a hi.

Kibulphu thak kit pawimaw

Hukdamna i chan limlai
gual tho ah khan tuni'n lê i hing
zel di a hi. Ginna chu taksua a
hi zinglo chun ginna hih thil hi
panglo ah a thu mai ah kawi
dap khak thei a hia, a tawp leh
ei leh ei kithep puk ah ginna
phatsan i hiam ziang lê kihiatlo
khak thei ding in i khawtâng
hindanteu apat a muthei hi.
Zia gual dinmun lau-um tak
chu i tun masang ah eima
kisuichian thak a pawimaw
ah, kisukdik thakna di umte
kimudaw a pawimaw hi.
Hiatna bep ah kisuklungmuan
guatna, a hepen hi zia ah
lungawi guatna, Pathian

thugil he ma ma a tak ah
hinpi diaklo, a hetna mai kha
lungmuan muanpi mi tamtak
um in a ngai thei hi. Thu thak,
la thakte in a dangchak ma
mau ah, thugentu minthang
leh thugen thiamte thugen
ngaithak ah limna leh kipakna
thak mu gua'n, maleh thutak
a hiat kham khamte a tak ah
hinpi diaklo, het belapna in
lungawina pia hi in a kingai-ua,
hetna ah a lungawi guatna zia
un thagau ah dangchak zing ah
kigel hinkhua mang mi tamtak
a um hi. Zia hi dinmun lau-um
tak a hi.

Bible simte, pauchapte leh
Biak In kai zingte hi thagau lam
malzawl dawnna bulpi a hia,
hinna petu a hizing hi. Mi dang
thil bawl dante, a hindanteu
buaipilo in, mi'n thilpha a bawl
leh bawllô buaipilo in, eima
leh eima i kibuaipi kum hileh
Thagau lam ah kal sang tak i
suan kum hung hi ngei ina. Mi
dangte chu Lalpa khut ah kawi
in eima kibuaipi phawt leu hin
Lalpa'n ei mang intin, i kiang
leh kîm mi dangte'n le i zâlzo
ngei di a hiu.

KHANGTHAKTE LEH KINGAIZAWNGNA

~ Rev. PC Lalropuia

Tpl 4:14-15

“Miphalote lampi’n vak lut kin la, thil phalo bawlte lampi chule zui kin. Pel inla, vak lut kin; zia lampi chu kiheisan inla, chia theng ziang in”.

1 Ko 13:4-7

“Hepina chu a dawthei in; hepina chu a ngilnei in; hepina chun a thangsia pua’n; a kipakcha pua’n; a kisathei pua’n; a tawi melsia puai. Ama ma khua bep a khual pua’n, a lungna vak pua’n, phatlona lam a ngaitua pua’n; dik lona a kipakpi pua’n, thutak vang a kipakpi sek hi; bangkim a thuak ham ham in, bangkim a gingchan, bangkim a kinem in, bangkim a thuak mual suak sek hi”.

Mihingte hi kingaizawng thei ding in Pathian in ei siam a hia, zia chu ji leh pawsal ah kineina lampi a hi. Nam khenkhat lak in a hileh nu leh pate’n a kingaizawng le hilo a kichensakua, ei uh lak in a hileh a tamzaw kingaizawng masa kichengte i hiu. Kingaizawngna hi gitlona hilo maleh matkhial thei a hia, i hinna ding gual tak le ei hilo sak thei a hi. Malam hun hung tung zel a ding ah le i hinna susia thei a hi zia in pilvan ma ma di a hi. Ei mimal hindan bep a sukha pua, midang le sukha a hi zia in pilvan diak a pawimaw hi.

1. Kingaizawngna hi leilung dan a hi

Kingaizawngna hi mihing bawldan mai a hi pua, Pathian in mihingte um dan ding ah a bawl a hi zia in leilung dan ti in le gen thei a hi. Mihing kidawituana hung piang hi a lul a, Pathian malsawmna a hi. Mihingte hin midang ngaizawng theina lungthim neilo taleu hin chu mi phalo ki hi zaw di a hi. Kingaizawngna tiang chu tunglo, mel hawisakna le a um a, tulai khangthakte’n a mat uar ma ma star ti hi a hi. Star nei hi thil diklo leh soal a hi pua, mihing hinna pa-ngai a

• ‘Tleirawlte leh tunlaina’ Lekhabu a pat kiladaw a hi

hi zawi. Star nei ziak a ler ding tina le a hi pua, star nei hi lerna le a hi diak puai. A hun ah ngaizawng nei hi a pha, mihing hinna sukbukimna pakhat a hi.

2. Ngaizawng nei hun a um

Ngaizawng nei hi leilung dân a hi timale hinle a hunlo ah ngaizawng nei hi kuama a di'n a pha diak puai. Naupang cha ah ngaizawng nei hi a hawi pua, nungak tangval vak takluat hi le thil zachak um a hi. Naupang nalai, lekha sim hinna lai a ding in ngaizawng nei a hawina hiat ding a vang hi. Nungak-tangval piting hi nailo chun ngaizawng nei guat ham ding a hi pua, malam hun a ding ah kisaklawk pawimaw zaw a hi ziak in zilna lam ah pan lak hi a pha pen a hi. Naupang lai ah ngaizawng nei hi nu leh pa'n sawisel lo maleh phasa diak khel puanau. A hinla, ngaizawng nei him him hi sual gual ah ngai ding chu a hi puai.

3. Mi ngaizawng lui hi zing di a hi puai

Ngaizawng nei hi sual a hi puai ti ziak ah tampi nei ding chu a hawi diak puai. Mi nungak/tangval lui hi hi a kilawm pua, mi hal dan ah kilatsaktu mai a hi. Mi tampi nungak/tangval lui chu zi/

pawsal ding ah dawina a niam deu hi. Thil chin zawngsak a hi chun ngaiman thei a hia, ngaizawng nei lem lum a hi chun mi pakhat ah ginum le a haksa thei a, mi dang in le mi ginumlo mu ah ei mu pai ziang thei ui. Ngaizawng tampi nei a hi chun zi/pawsal nei nung ah haksatna tuak khak thei a hia, midang hiatlo ah na sa tak ah um thei a hi.

4. Thiangtho tak a nei di a hi

Ngaizawng nei hi sual a hi em ti chungchang ah sual a hilo dan i gen tau. A pawimaw pen chu ngaizawng i nei dan a thiango na em ti hi a hi. A thiantholochuntawmchahileh le sual a hi tho hi. Ngaizawngte numei-pawsal hinna (sex) ah kipawlpi lo in, thiango leh fel tak ah ngaizawng nei thei a hi chun zia chu a hawi pen a hi. Mi khenkhat in ngaizawng nei hi a phatchuampi ua, lekha thiam a guau a, nasatak in a zil ui. A kithuapiteu a tatsualpi gua puau a, thiango tak in a kingai ua, a hinkhuau hung chia zel in Pathian in le a malsawm hi. Pawlche tak ah kingaizawwna hin eima dawina khel ah a phalo lam in sautak ei pui thei a, ngaiman ah phalo tak in ei pui thei hi. I hindan

zosia hi Pathian in mu zing a hi zia in i bawl dan tiang tiang ah ama'n ei malsawm didan le a henai. Pathian malsawm tak a ngaizawng nei hi a lul a, Pathian dawidan hezing kawm ah hinkhua mat hi a pha a hi. Sex kipawlp i lo zia a simmaw ahem, taisan ahem i tuak tak in le ama sang ah lopi zaw Pathian in ei ngainep pua, ei taisan lo ding a hi ti hiatzing di a hi. Khangthak lai ah pilvanglote chu a hinkhua lampiu' a dawi um puai.

5. Nu leh pa tawh genkhawm zel a hawi hi

Nu leh pa za hi a pha, bawl dan ding him le a hi. Chun, thil genkhawm hi zil di a hi. Ngaizawng chungchang ahem, thil dang hitaleh le, nu leh pa tawh genkhawm hi a hawipen a hi. A gûk ah thil bawl hin kihomatna a siam thei pua, i dawipente chanchin hi ei lungsiattu nu leh pa kiang tut hi a pha pen a hi. Amau in lampi pha leh dik chu ei kawkm thei in tin uh, a pawimaw hun ah ei venpi thei ding a hui.

6. Vâl lo di

'Vâl kih' ti chu tulai paukam ah 'over lo di' tina gual a hi. Kingaizawngna thil in val takluat khak a bailam hi.

Ngaizawngte dawi takluatte, kituklut takluatte, kipak takluatte, lungngai takluatte hi a hawi him him puai. Lungthim ah kawi zing ding chu ngaizawngte hi zi/pawsal ding a hi khello maithei uh ti hi a hi. Ngaizawng pakhat tawh val tak ah um in, ama chu tawh hung kikhen ta le hin mite mu dan a dik thei puai. Kilawm tak, pha tak in, kiveng zing kawm ah ngaizawng nei di a hi.

7. Ji/pawsal nei hun ah nei ziang di a hi

Bangkim in hunbi a nei vek a, zi/pawsal nei hinle hun a nei hi. Nei vak takluat ahem, vaigei takluat ahem a hawi him him puai. Ji/pawsal neithe i hi hun ah kichenpi ding mu a hi chun neimai a hawi hi. Ji/pawsal nei hun la hita ngal, ngaizawng chuam chuam nei naklai hi thil dik a hi puai. Eima bep hilo in midang le sukvaigei thei a hi. Vaimatak a zi/pawsal nei hi a kituplona a um baw a, lungthim pitinglo tak in sungkuan siam khak thei a hi. Vaigei tak ah nei hi le cha nei a haks a, nei hun a hi nak chun vaigei tak a nei ham guat ding a hi puai. A tawp leh buai guk thei, law didan helo ah um thei a hi.

LUNGZING A HI ZIAK AH LUNGKELO - HUDSON TAYLOR

*China Inland Mission kiti tu ah Overseas Mission Society
kiti, (a het bai dingin Rev. Ginneithang Ngaihte te sepna
Mission) phudawktu hi HUDSON TAYLOR a hi.*

Ama hi leh A pa hi ma 1832 May 21 in a piang a. A nu gingu hawi tak ala hui. A hisel zia in a neulai in kum ni vêl lo ma School kai zawm theilo in a um in, Inn in lekha a zil hi. Kum 14 a phak ma'n a pa'n Hebrai (Hebrew) lekha a la zil sak hi.

A pianthak dân hi mak deu tak a hia, a nu'n a khual chia na'n a chapa Hudson In ah a nutsia pianthakna ding in nasatak in pauchapna a nei ah. Anu a hung tun phat ah chun a umlo kâl ah a lah piangthak dân chu a nu a hil leh Anu'n ka he vek hi a tia. Bang la ti het a hem nu? a ti leh a nu'n Pathian in hun hukdam ngei in a ti muang-ngamna ka nei masa ka hun pauchap piak ziang a hi ti'n a dawnhu hi.

A pianthak zaw thâ bangzat a h'em zaw in a Bible kichawi in khupdin in a pauchap ta. "Lalpa bang hi ding ah lei daw a hem lei gen masia zia pindan apat hi pawtlo di ka hi" ti hial in. Tichun a hung pauchap chap leh Lalpa'n "Kei â din China gam in chian" ti gual in a hun he ta. Zia ah kipat chun a lungthim chu China gam in a cham ta, Pathian kona chu a gingla kit talo a hi.

China chiana ding ah kisak-lawkna

China gam chanchin hetna din lekhabu tam tak a sim a. Thagau lam hinna thukzaw sêm leh Thagau ah dim theina di'n nasatak in a pauchap hi.

• 'Pathian matchak Khanglaite' Lekhabu a pat kiladaw a hi.

Zilsaktu umlo in China pau in Luke zik a hia. Nasatak ah kisawizawi in nasep a ha bawl hi. A pa sumkawlvaina a kithuapi kawm in Latin pau, Greek pau, Pathian thugil leh Damdawi lam zil a thua ah. Khawvel mun chuam chuam ah chanchinpha puanzakna nasem pawl le a kihiatpi hi.

Kum 19 a tinah London ah damdawi lam zil be a um lai in, Thagau lam kithununna khautak a thuak a, himaleh a haksatna leh a gentheina chu Khrist kiang ah pui naitu a hi. A summu sethum sua ah seni chu Lalpa â din a pia. London ah a umlai a chun “Ziagual tawbang bep hi Pathian in mangthei a hi maw?” ti maksak um tak a hi a kiti. A gawng ah, pukse ziang di gual mel a pu a hi. Mihing tena dan ah chun bang kawng inle chanchinpha genkhak nailona a mâ phu ding ah chun a suan gum puai. Himaleh, Pathian thutiam chu “A hihatpa Khrista zâl ah chun bangkim

ka bawl thei hi” ti a hi. Ama lopina a chantheina ding in Hudson gual a mi zawngkhâl tamtak a mat a um sek a hi. Khangdawng Hudson ginna chu London ah a um sung ah chun chet in a um sek ah. A umna leh a zilna Hospital kikhâl mile 8 ah gamla chu Bus chuanman di a neilo ziak in keng in a zawt sek a; a annek a tawm ma ma ziang ah, vaithum (*loaf*) tawm cha khat chu zing an leh nitak an in a ngansia sek a hi. Khatvei chu, mi khawsik hat tak ziak ah thi, a khawina kipat a khutzung suliam in Ama le thakhat in a dam pua, thi tavang ah um in China gam ah a thiltup chu bang a ti ta dia aw ti a gel vung vung ah. Himaleh a ginna chun a pui zel ah a hung dam pai tai. Zia zosia apat chun ginna hat hat zaw sem a hun nei khawlaw tai.

China Gam ah

Mi pathum bep ama mangpha thâk ding nei in 1853 September tha in Hud-

son Taylor chu ko a hina leh a thîl zingna gam China zuan di'n kuang in a kitawl pan tai. China Evangelisation Society kiti pawl in a sawl uh a hi. China zuan ah tuipi chung ah Lawng ah a chia sung chu tha 5 leh a kim a hi. Kum 22 a tin kum in mi dengdel tak Hudson chu China gam khawpi khat Shanghai kiti chu a kitawl tung tai. China gam lei chang a vak taw hun ah, Hudson kipakdan chu gentheilo khawp a hi. Chanchinpha â ding ah China gam hawngtu hi'ng ka ti chu kihe hingei in ah.

Lungzing a hi ziaak ah lungkelo

Taylor â ding ah chun lungkiak theina ding tampi a um sek ah. Amasang ding chu a thim ziaak in hitin a zik ah "Ka malam chu khatvei thun kal khat bepcha a kichian sek a Pathian chu ka ngak lothei ngaipua, aman ka ki ngalo thei pua, chutichun bangkim chu hung lamjang ngei in ah" ti in.

Sum leh pai a hung tung gin a ngai pua. TSungging ah Damlo kaituana bawlkawm a sang tamtak kiangah Chanchinpha a gen zing lai a chun British sorkar palaite chun gam gillam ah lut lo di'n thu a piau a, a lut a hi leh sum tamtak liausak ding ti'n. Zia ban ah chun British ten China gam lau umna hun veng lo ding ka hiu ti'n. Himaleh, Taylor chun venbitna dawina ziaak bep ah chun Chanchinpha hekha nailo te kiang ah Chanchinpha gen ding chu a haisan nuam diak puai. Lungkiak thei ma ma na dang khat chu a 5hi leh a lawi pha tak leh seppi William Burns thina a hi.

Doctor umlona Longchawlna mun khat Ningpo kiti mun ah chun nasepna pan thak di'n aki sa. Zia mun zuan ah a chianau ah chun a van pawpa chun a suama, a taisan ta. Nek leh dawn ki tuplo ziaak, imut khawplo ziaak leh thachawl ziaak in a chau ma ma ah lamlian pam ah a um lai a chun le a van

mang sang a chun thagau mangthaite a ngaikhawk zawi a kiang kimvel ah umte kiang a chu Krista chanchin a gen tho a hi. Ningpo ah a ki mupi Maria Dyer tawh hung kicheng in, damlote kaitua khawm in Chianate kiangin Chanchinpha a gen ua. Sawtpi pi lekha sim ziak, thugen ziak leh azu asa nuai ah zin vel vel ziak in a hisel-nan zo talo in damlona ziak in kum sagi a sep nung in England lam in a châm loin a hung kile kit tai,

China Inland Mission

London in damdawi lam a zilna chu a zo thi-ang a. China gam bung 11 sunga mipi Maktadu-ai 38 Jesu Krista chanchin bu leh lekhapek ten a a hawm dawk zel sek a. Zia gam bung 11 ah chia ding chu Mission-ary 24 dawn in a pauchap sek hi. Ni ni zaw in Ginna'n paisa tawmcha China Inland Mission min in Bank in ava kawi a. Chutichun, ginna gâ China Inland Mission chu a hung kipan tai.

Pathian in a pauchapna a dawnhu a, tha 11 zaw in Missionary a dawt 24 lak a 16 te tawh kitawn in China gam zuan in a ki tawl pan tau. Amau sia chule, Hudson guala law mu ngei ngei di tile um lo in Pathian thutiam ah kinga'n a chiau a hi. A chi-ana mun ding uh he masa le hilo in a kipandawk mai ui. Amau a la lamtua ding chu China'n khat le a um pua, gam dang mi a huatna gam uh gil lam achun chia a tup tin ten ua. Long chung ziang inle Longpu 34 lakin sawmni val in Jesu Krist a pawm mai ui.

Hudson Taylor China Gam lut kitna.

Shanghai khawpi a tun zaw un, gamgil lam in a hin-nau lauthawngum tak in a lut tau. Khangdawng Taylor chu a puitu'n a pang a. Nek leh chak ding a nei lo hun uh a tam ma ma a, himaleh Pathian in a pawimawteu a pe zel a. Taylor lawtinna thugûk chu naupang ginna

gual a ginna mawltak a nei ziak a hi. Amau ah haksatna ginna ah kizota phawt chu Pathian chate a ding in hat-na leh kisukthakna a hi sek hi a ti.

Kum 20 vel zaw ah chun China Inland Mission chu a khang ma ma ziang a Missionary 225, Kochuam 59 leh gingthak 100 a hun nei ta a hi. Training na di In te pan in, lekhabu lian leh neu sang tamtak a hawm dawku ua. A hin manna a um tho hi. A zi leh a chate Pathum a chên a hi. A zi'n a pawsal kum 12 leh a kim a kithuapi nung in Cholera vei in a thita. a chanu dawithaw pen a thi in hitin a zik a: "I lungthim uh a thi pawt a, Himaleh bang cheng sang in zia thu hi tepite in um hen -I Lalpa Jesu'n bangkim a pha di'n a bawl sek hi" A zi thi in hiti'n a zik ah "Ka ngawn ah um kei pua, a ziak chu tuma zosia sangin Pathian ka kiang nai in a um hi". Chutichun a chênna zosia a thuak hi.

A hun tawplam

China khawpi zosia Khrist a ding in a siam a gua, Damlo ah sawtpi lupna a ngaksung in Pathian in China gam ah nasep didan thupi zaw a mu sak a, a hung dam kit phat in a zi tawh China gam nasepna pawimaw dan gen in United State (America i ti deu sek pen uh) Canada gam Australia gam leh South America gam a fang vel ua. A hin Masanglai ah a bawl dan gual man paisa a dawn ngai diak puai. 1905 kum in China gam zuan kit in a thi di tiang in China Inland Mission chun Missionary 849 a nei hi.

Hudson chu zia khawvel nei leh lam leh nawpsakna kawng in a chaga tak zet a, a hinlah mi tampi a su hausa a hi. Zia thuguk chu Pathian hing leh a thu chu a gingcha. A thuthiam chu hun bawl ngei ina ti a muang ngam a. Ama chun hitin a ti sek a "Ginnna chun thilhitheilo kiti chu a nuisan sek a, thumatna chu bangma a dawn-glo ngai puai" a ti.

HUKDAMNA

(2 Ko 6:1-2)

~ Rev. Ph. Thianneilal Vaiphei
i/c Dongjang Pastor Bial

Rev. John Harper chu April 5, 1912 Titanic Lawng Lian Rin Vuk Tang a takhâk ah tuasiat a tuanao ah khan a pang hi. Passenger 2240 te lak ah mi 706 kihukdawkte laka pang a hi. Testimony a genna a chun, “Ziagual vangsiatna ka tuak zân ah khan khawksakna bei, Pathian neilo migilo ka la hi.

Zan khawtim nuai ah vawt sa taka Atlantic Ocean chung a hinna ding ka hawl nasat zia chu ka hemil thei puai. Thim nuai in banghem khat ka maikha ka hinna ding in ka tuchak mai hi. Tuipi ah tummangte lungngai leh beidawn thawmgi chu ka bil in a ging zing hi. Ka kiang ah mi pakhat um chun, La thagau hukdam a hi ta em?” ei tia, ken a hi nai puai ka ti piak hi. Ama chun, “Jesu Khrista chu ging le chin hukdam hidi la hi” ei ti. Ka kikhen zel ua, ka hung kimu kit phat un ei dawng kit a, “Hukdam ka hi nai puai, ka lau taluai,” tin ka hil hi. A tummang dite kiang

ah chun a kiko ah, “Lalpa Jesu chu ging un, tichun thagau hukdam hinlau. Ken le Jesu ka ging in hukdam ka hi tai” a ti piak zel hi. Chawmkhat zaw in ka tum suk tai tin a kiko a, maleh hukdawktuten a hun kaidaw un hukdaw ka hi tai a ti.

Hukdamna chu bang a hi em?

- Gitlona tui in i tummang ua maleh Jesu chun ei hung hukdawktai.
- Gitlona zia ah i mansak tâk uh kumtuang hinna leh Pathian tawh kipawl na chu Jesun ei hung le piak (recover) kit tai.

- Gitlona zia ah Pathian tawh kikhen ta chu Jesu'n ei hung zawp kit tau
- Jesu chu khawvel in ama leh ama thilpiak a kipia ding in a hung ah, ama chu Lal leh hukdamtu ah kipawm zosia chun hukdamna chang di a hi
- Hukdamna chu Jesu ginna zia ah kumtuang hinna chu a hi (Jn3:16)
- Chanchinpha chu namtin chitin hukdamna a hi (Rom 1:16)
- Hukdamna chu Lalpa â a hi (Jonah 2:9)
- Hukdamna kalbi chu : Chanchinpha ngaithak/taksan, Gitlo kisik/sim, Jesu ah ginna ngak/puandaw, baptisma, thi tiang ah ginum.

Hukdamna hi eima sepdaw a hi puai!

Kraws ah Jesu'n a sep zaw tak chung ah bangma cha belap thei a um puai. Jesu'n i gitlo nau ngaidamna dinga pawimaw bangkim a bawl zo tai. Ei-uh mawpuakna chu "ging le chin hing la" ti a hi. Jesu thilbawl chu ging inla hukdamna chang la hi mai

hi. Luka 18 ah khangdawng mihausa pan Jesu kiang ah, "Hukdam ka hina ding in bang ka hi ding a h'em? a hun tia, a dawt dan apat chun hukdamna chu eima theina leh hausatna ah chawk thei a hi sak tuak hi. Kumtuang hinna chu mihing hitheina leh go thil sang in a mantam zawi. Visa muna ding ah eima account ah lakh 5/6 bêk umdi ti haw gual kha a hi puai. Jesu nasep zaw tak kha ging le chin hing in la ti a hi tawp mai hi.

Hukdamte chu Pathian mite, Pathian chate a hiu.

Jesu'n ka belamte a ti chu a hi. Hukdam chate, Jesu belamte chu bang ti um ding a hiu em?

- John 6:39-40: 'Zia hi ka Pa ei sawlpa doigual chu a hi, ama'n ei piak zosia chu, bangma matsua neilo in, nitawp ni leh kaitho zaw leng.
- John 10:27,28: 'Ka belamte chun ka aw a hiau hi. Ke'n le amau chu ka hia'n, amau chun ei zui sek ui. Chuleh, a kiang un kumtuang hinna ka pia'n, bangtik chan inle

mangthai pua'nau. Kuama'n ka khut ah kipat ei lâkpiak pua'n au. '

- Rom 11:29: 'Pathian in a thilthawnpiak leh a kona haw chu sukbei kit thei a hi puai. '

Hukdamna chu bang law ding ahem?

- PHILIPPI 2:12-14 - Lau leh kithing pum in hukdam la hi'nau chu sêm bukim tau in. A lung lam sêm ding ah sepnawpna hun pepa chu Pathian a hi ngal ah. Phunchiak leh kinial lo in bangkim sêm un.

- HEBRAI 2:3 - 'Ziagual lawm ah hukdamna lopi hi ngaisak lo in um leu hin, bangti'n suakcha thei ding i hiu em?

- JUDA 1:3 - 'Dawitakte haw, i kikawp uh hukdamna a tia, common ah i nei uh a hi zia in i pankhawm ua i sep khawm uh a ngai ma ma hi.

- LUKA 1:77,79 - 'A mite chu a gitlonau ngaidam ah, hukdamna chu hiatsak ding in. Thim lak leh thina lim nuai ah a la chute, salvâk ding leh thamuanna lampi lam ah, pui ding in," sawl i hiu

Hukdamna chu bangti sep bukim ding a hi diam?

- 1 KORINTH 7:16 - 'Aw ji, la pawsal la hukhin leh hukhin lo ding la hia a h'em? Aw pawsal, la ji la hukhin leh hukhin lo ding la hia a h'em?' Hukdamna nasep a hin zi/ pawsal hinle mawpuakna i nei ui.

- Hosea chanchin hi ka sim phat leh ka laidip a dap ma ma ziang sek hi. Jawlnei hinapi ah melhawî deu, mi pha leh umzia he deu chule kichenpi sak le pha ding a hi. Nawchizuak khel khel a kichenpi sak ah, a taisan a, kichenpi kit nalai ding in sawl a hi kit hi. Ziagual zêl a hin Lalpa rawngbawltute hin hukdamna nasep hi chu a haksâ ngei mai. Ziagual na haksâ chu sembukim ding ah sawl a hi, a chawldam umlo hial hi.

- Jonah chanchin ka en kit a, Jonah chu migilo leh misual tawp khawk Nineveh khua mite kiang ah "Lunghai ah sua sim ding leh hukdamna thu va puang dinga sawl a hi kit hi." A gitlo dan u leh a

mawl thei dan u chu veilam leh changlam hekhen theilo a hui a ti. Michu sualna a dim phat leh banggual in kipil sak leh le vei leh chang – a dik leh dik lo, kihethei lo a hi zia a kilang hi.

- Ziagual tuk ah chu haksa leh bawl nawp umlo himaleh Lalpan ei sawl u a hi. Lau leh

kithing pum ah hukdamna nasep chu sê̄m bukim ding in ei hil u a hi. A ziaak chu mihingte zosia hi Lalpa'n a melpu' a siam a hi ziaak in kuama mangthai ding in ei dawilo a hi. Zia ziaak chun, unaute haw tu hi hun kipak um a hin, tuhin hukdamna ni chu a hi.

KHRISTA GINGTU HÎNA AH EIMA KIDAWT DI TE

Matthai 22:37 ah kipat

- Pathian hi Khawvel thilte sâng in ka hepi tak tak zaw nam?
- Pathian Thu leh Pauchap na hin ka hun ka pia tak tak na em?
- Nawp kasak hun bep ah Pathian thu zawm ka hi em?

Jakob 1:22 ah kipat

- Bible thu tawh kituak ahem, ahiloleh Khawvel dân tawh kituak ah hing ka hi em?
- Bible hi Kisang danglamna di a hem, a hiloleh hetna belapna di mai mai a sim ka hi em?
- Jesu Khrista Chanchinpha tawh kituak in Ka nisi'n hinkhua ka mang sek nam?

I Corinthians 13:4–7 ah kipat

- Khrista gual ah Hepina leh Zângaina tawh hing sek ka hi nam?
- Pathian in ei ngaidam gual in midang te ka ngaidam tak tak nam?
- Ka kam a kipat thu pawt te hin midang te chung ah kipakna a tun sek nam?

KHUPDIN IN A ZO HI

~ *Dr. Wesly L. Duewel*

David Livingstone, John Knox, John Wesley hi Pathian â ding ah mihat minthangte chu a hui. Tulai a hi mikhenkhat chun ziagual ah ginna mihangsante haw a titlona leh hatlona teu haw hawldawk thak, suk minsiat gua a chanchin uh zik gawlawi a la hum ui. Pathian in a titlonau hezing kawm in a leng un a mang a hi. Ziagual ah chun nang leh kei le ei mang hi. A nasep thupipen zia ah minthang hilo in a pauchap zia un a hi zawi.

David Livingstone chu a ding in a chawklumlet in, pauchap mi thupipen hikha thianthona dan a zilsak hi. ding a hi. Khupdin zing in athi John Wesley chu ni khat sung a hi. John Knox hi milungthim in mêl-60 leh mêl 70 kikal tâk tak leh puitu kizillo, tinglo sakawl chung a chuangin himaleh Scotland gam ading thugen in a zin hi. Kum ah thagau lam kidona chun a sawmnga leh li a hi in kumkhat kikhûp din ah pauchapna'n a sungin sakawl chung a Pathian zo hi. Scotland gam pumpin thugen in mêl 5000, vel achia hukdamna amuna chu a hi, a leng ah gawm khawm thugen leh a nasepna zia hilo in mel-2,90,000 azin ah, zia in a pauchapna zia a hi zawi. chu khawvel hi vel sawmlehni vei vêl suak thei a hi. Kum

John Wesley in vang Insung sawmnga leh li sung a nasepna nuam neilo a hi, a hileh chun chawlkal khat sungin banggual in a hina a chia em ? sermon sawm leh nga (15) A zi chun la a chawkbuai zing vei agen hi. Zia chu leh fuina ziang, a hinla zia Pathian pa thu leh thugen pângâi simlo hin chu England gam pumpi in a hi. Achang leh tual zawl

• 'Pauchapna'n Khawvel a chawklung in' Lekhabu a pat kiladawk a hi.

ah kikhawpna mipi sing khat sângni, sângthum te kiangin paungaina manglo in agen sek hi. French Revolution (French helna) thupitak ah thisan sua a hun pat thak kit ua khan England pumpi sukdanglam a um ah hukdawkna, siamtu Wesley nasepna chu khawvel chanchin a ziaktute chun a tepteu a hi. John Wesley in hikhial nei tho maleh pauchapmi a hi. Ama chun Pathian in “pauchapna a dawnhu lo in chu thildang a hi puai”, a tia. Ama chung chang a chun zia gual a hin gen hi, aman thildang zosia sang in pauchapna hi a ngaikhawk pen in, a pindan a pat a hung pawt chun amai chu thiàng sing seng in, a vâk a hi, atiu, Wesley chu nisin in dakkâl ni pauchap na’n amang zing hi.

Luther pa phawk deu tak kha mihiam ma ma a hia, a hinla pauchapmi a hi. Ama chun “Kamu dân in ka pauchapna hi Diabol gual hial a hia, zia chu hiloleh chu ma tak in zo ta ma ma ing ka, Ahinla mite chun kei thasanga

Pathian in thilmak abawl chu he khêl puanau, chun keiman pauchapna hi nikhat ziang le thatham leng ginna mei kuang chu man sua mai di ka hi”. tin a gen hi.

Mite chun Luther chu “Pathian apat adawi tapo nei thei mi a hi” atiu. Luther kiangin numei naupang thitha buakvawp khat hi ahung pui ua, aman a luchung ah khutnga a pauchap piak le a dam thiàng ngal mai hi. Luther pauchapna thilhitheidan chu thina kawt khak ah dâk mi tam tak chu pui kit a hiu.

Melanchthon mit chu athim zota, athugen leh angaithakna le a chau zota, kuama ahe ta pua, bang male ane thei ta puai. Luther in a um dan a mu chun, Pathian kiang in nasa takin a dawn ah, Melanchthon khut atu’n “Philip hangtak in um in thi puanla... Lalpa that thei leh sudamtheitu khut in kinga’n” atia. A thugen lai achun Philip chu a hung tawi a, a hung hat pankit ta, tichun hunghat in ahungdam kit tai.

Mycanius chu T.B. vei thiding ah lum chu Luther in a pauchap piak ah Luther chun “Ka damsung ah la thi ngei ngei chun Pathian in ei hiatsak ki hen lang, nang damna dingin ei siam hen la, phat chuam ngaitak ah ka pauchapna hi ei phalpiak hen lah, chun ka dawi leh ngaite tu hin hun phalpiak hi hen, Amen “ti hin a ziak ah. Mycanius chun, zia chu Khrist in “Lazar hung pawt in” tigual in a hia, Mycarius chu a dam a, Luther sangin a damsawt zaw a hi.

Pathian mithiangtho zosia chu nang leh keigual ah mihiam a hui ah, a hinla pauchap hat mi a hui. La pauchapna khel in lopi thei puan la, a hin la Pathian tawh laki tawn zing chun pauchapna’n lopi thei inla: Zia gual ah pauchap piaktu thupi pen pen te chu Pathian tilo midang in ahe khel puau hi.

Abang hileh chingthei in, Pathian mitmu ah mi thupi hi la guat chun thupi ngai ngai puan la, nang ading ah thil lopi

hawl la hem? hawl kin, (Jer. 45:5). Hun chawm cha sung pâchatna, mite sim mawna leh mihiam tamtak law sapnate le ngaitua in, Baptistu Johan gual ah, “Lalpa mâ milian” hung hi di la hi (Luk. 1:15),

Thagau lam ah milian hitheina chu thagau a dim hinna, ki ngainiam tak ah Pathian tawh kitawn, Pa Pathian tawh kithua zing, Chapa Pathian leh Thagau Thiangtho Pathian tawh kinai tak ah hing zing a kithua a kul hi. Pathian in pauchap piaktu ding a hawl zing hi. Midang pauchap piakna hîna kiselgu a hi. Khristian tamtak chu Pathian tawh pawlam a kitawn in a um ua, ziate chu ngaisang sangin a ngaidau zaw uh a hi.

Mosia chu khawvel a pauchap tu lak ah thupipen a hi, chun nangle Pathian in hat takin a hun mang thei hi. Elijah kha khawvel a pauchapna sepai lopi pen ah siam a hi chun, nangle Ama a dingin midangte pauchap piak pawl la hi thei. David chu kidak um tak a

thanghuai leh tual that ti hiat himaleh ziate chu zo in Pathian lungthim gual pu ti a hi chun, nangle pauchapna kithua khawmna Pathian kianga la kipiak thian chun David gual in nangle a dawî tak la hi thei hi.

Martin Luther gual ah nikhat ah dakkâl thum sung pauchapna la mat theilo tawp in le hun chamcha bêk mang in. John Wesley gual ah nikhat ah dakkâl ni sung pauchapna la mat theilo tawp inle hun chawmcha sung bek mangin. A hileh bang a hem la hi thei? U.S.A. President, George Washington chu zingkal sîn in dâkli (4) in a tho a, a pauchap thei chun, nangle zingkal in la chanaute sang ah tho masa'n pauchapna la nei thei hi.

John Knox, zân khawvak a tuang chung ah khupdin ah a châng leh kizam a kap pum in a pauchap a, "Aw Pathian Scotland ei pia'n achutilo leh thi mai ka" ti pa gualin la pauchap theilo mai thei hi. A hinla, midangte a dingin pauchap piak na puakgik la paw pan thei hi.

Pathian hepina zâlin pauchapna thil hi ding masapen in la kawî thei a, pauchapna chun hindan thak la siam thei hi. Nangma ma 'nang la hung mat ding dan ki zilin, pauchapna hun la guat thei hi. Pathian a ding ah la gil a kial nâk chun nikhat sungin panchapna ding hun muthei inla.

Nikhat a Pauchapna lampi thak la patna ding lamthak um hi. Pauchapna minthangte haw le kuama a minthang sa, a thupi sa, kipan a um puai. Pathian mai chu a hawl zing uh a hi. Amau in pauchapna aman piak a huam ua, tichun pauchapna mihat khawkheng a hung hui hi.

Pathian in pauchapna kal thak suan dingin a hung ko hi. Tunî hin panngal in. Pathian tawh kitawn thak inla. Tunî'n pauchapna hiat ding siam pan inla, pauchapna mun bik le nei ngalin. Elijah leh pauchapna minthangte haw le nang gual tho a hui hi. Pauchapna hun tamzaw nei la nawp tak tak a hi chun mun khat in kikhumbil in, la hi diam leh?

PROGRAMME

Thupi : “Pauchap Thilhitheina” (Esther 4:16)

A mun : D. Khawzim Kochuam Biak In

A ni : Ni 27 February – ni 1 March,
2026

Ni 27 FEBRUARY, 2026

(SIMHAINI) 06: 30 P.M.

PALAI LAWPNA LEH REPORT

Puitu : Pi Kh. Thianniang, Chairman CKNP

Pantu : New Lamka Pastor Bial KNP

Lapawl : D. Khawzim Pastor Bial KNP

Report khaikhâwmna : Pi Neikhawvak, General Secretary

Thugentu : Rev. Lamgouliau Hatlei i/c D.
Khawzim Pastor Bial

Ni 28 FEBRUARY, 2026

(KIGINNI) 06: 00 A.M.

DEVOTION

Puitu : Pi Chinngaikim, Committee Member,
CKNP

10: 30 A.M. | VÂIHAWMNA

06: 30 P.M. | PATHIAN BIAKNA KIKHAWP

Puitu : Pi Kh. Thianniang, Chairman CKNP

Pantu : S. Kawtlian Pastor Bial KNP

Lapawl : Munpi Pastor Bial KNP

Thugentu : Pi Dimtinniang, Committee Member,
CKNP

Ni 1 MARCH, 2026
(PATHIANNI) 06: 00 A.M.

DEVOTION

Puitu : Pi Phalhawiniang, Committee
Member, CKNP

Ni 1 MARCH, 2026
(PATHIANNI) 10: 30 A.M.

PATHIAN BIAKNA KIKHAWP

Puitu : Pi Kh. Thianniang,
Chairman, CKNP

Pantu : Leilon Pastor Bial, KNP

Thilpiak : CKNP â di

Lapawl : 1. Munpi Pastor Bial KNP
2. Tangphai Synod Choir

Thugentu : Rev. S. Lama Vaiphei, Moderator

Thagaulam Thupi : “Pauchap Thilhitheina” Esther 4:16

01: 00 P.M. | SEMINAR

Puitu : Pi Veithiannei, Vice Chairman CKNP

Thupi : “Thianthona”

Resource Person : Pi Hoibetty, Headmistress,
V. K. Tawna High

06: 30 P.M. | PATHIAN BIAKNA KIKHAWP

Puitu : Pi Kh. Thianniang, Chairman, CKNP

Lapawl : 1. D. Khawzim Pastor Bial KNP
2. Tangphai Synod Choir

Thilpiak : Zintuntu â di

Thugentu : Rev. C. Lalremruata, Consultant